

Timbalan Presiden MIC Minta Pemimpin BN Berhati-hati Berhubung Kenyataan Berkaitan 'Kumpulan Tertentu'
Bernama
Mei 27, 2014

TELUK INTAN, 27 Mei (Bernama) -- Timbalan presiden MIC Datuk Seri Dr S. Subramaniam Selasa meminta pemimpin Barisan Nasional (BN) yang berkempen bagi pilihan raya kecil parlimen Teluk Intan supaya berhati-hati dengan kata-kata mereka tentang kumpulan 'tertentu' di negara ini.

Beliau berkata dengan tinggal empat hari sahaja lagi akan tiba hari pengundian, apa jua tindakan yang diambil perlulah yang boleh meningkatkan sokongan pengundi atau sekurang-kurangnya boleh mengekalkan jumlah sebelum ini.

"Pendekatan yang digunakan perlulah bersifat terangkum," katanya kepada pemberita ketika melawat Hospital Teluk Intan di sini.

Beliau berkata demikian apabila ditanya tentang perkara yang perlu ditangani secara berhati-hati semasa berkempen.

Subramaniam bagaimanapun tidak menafikan bahawa kadangkala, kerana terlalu bersemangat, pemimpin mungkin mengucapkan sesuatu yang tidak sepatutnya diucapkan.

"Kata-kata begitu mungkin terkeluar. Sebenarnya, mereka hendak katakan sesuatu yang mereka rasa boleh memberi sokongan kepada sesuatu kumpulan, tapi akhirnya menimbulkan penentangan daripada kumpulan lain pula. Kita perlu kekalkan keadaan yang seimbang," katanya.

Dalam pilihan raya kecil Sabtu ini, calon BN Datuk Mah Siew Keong berdepan dengan Dyana Sofya Mohd Daud daripada DAP.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1041872>